

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ODLUKA**

**O PRIHVATANJU ZADUŽENJA PO OKVIRNOM SPORAZUMU O ZAJMU  
IZMEĐU RAZVOJNE BANKE VIJEĆA EVROPE (CEB) I BOSNE  
I HERCEGOVINE ZA REALIZACIJU PROJEKTA  
„IZGRADNJA REGIONALNOG VODOVODA PLAVA VODA“**

**Sarajevo, oktobar 2018. godine**

Na osnovu člana 40. stav (5) Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH”, br. 86/07, 24/09, 44/10 i 30/16) Predstavnički dom Parlamenta Federacije Bosne i Hercegovine na \_\_\_ sjednici održanoj \_\_\_\_\_ godine i Dom naroda Parlamenta Federacije Bosne i Hercegovine na \_\_\_ sjednici održanoj \_\_\_\_\_ godine d o n o s i

## **ODLUKU**

### **O PRIHVATANJU ZADUŽENJA PO OKVIRNOM SPORAZUMU O ZAJMU IZMEĐU RAZVOJNE BANKE VIJEĆA EVROPE (CEB) I BOSNE I HERCEGOVINE ZA REALIZACIJU PROJEKTA „IZGRADNJA REGIONALNOG VODOVODA PLAVA VODA“**

#### **I.**

Prihvata se zaduženje Federacije Bosne i Hercegovine (u daljem tekstu: Federacija) po Okvirnom Sporazumu o zajmu između Bosne i Hercegovine i Razvojne Banke Vijeća Evrope (u daljem tekstu: CEB) za realizaciju Projekta „Izgradnja regionalnog vodovoda Plava voda“ (u daljem tekstu: Projekat) u iznosu do 11.000.000,00 EUR-a.

#### **II.**

Sredstva zajma iz tačke I. ove Odluke koristit će se za realizaciju Projekta „Izgradnja regionalnog vodovoda Plava voda“.

Osnovni cilj i svrha projekta je osiguranje pouzdane, dugoročne opskrbe vodom putem regionalnog sistema vodoopskrbe za općine Travnik, Zenica, Novi Travnik, Vitez i Busovača zahvaćanjem vode izvorišta „Plava voda“ lociranog u općini Travnik.

#### **III.**

Sredstva zajma iz tačke I. ove Odluke, odobravaju se Federaciji pod sljedećim uslovima:

- iznos zajma.....11.000.000,00 EUR-a
- rok otplate.....do 20 godina (uključen grace period)
- grace period.....do 5 godina
- valuta povlačenja.....EURO ili USD
- kamatna stopa.....bit će fiksirana posebno za svaku tranšu povlačenja, a zavisi od valute povlačenja svake tranše kredita, od iznosa svake tranše, kao i od perioda otplate. Za povlačenja izvršena u EUR-ima primjenjivat će se EURIBOR, a za povlačenje u USD-ima, primjenjivat će se USD-LIBOR.

#### **IV.**

Potvrđuje se da je razmatrana dokumentacija prihvatljiva za Federaciju, a posebno:

- Nacrt Okvirnog Sporazuma o zajmu između Bosne i Hercegovine i CEB-a

#### V.

Sredstva zajma iz tačke I. ove Odluke Federacija će prenijeti na Zeničko-dobojski kanton i Srednjobosanski kanton i to:

- Zeničko-dobojski kanton.....7.150.000,00 EUR
  - Srednjobosanski kanton.....3.850.000,00 EUR
- UKUPNO 11.000.000,00 EUR**

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

Projekat će implementirati Jedinica za provedbu projekta „JP Plava Voda d.o.o.“ Travnik.

#### VI.

Zadužuje se Federalno ministarstvo finansija da sa Zeničko-dobojskim kantonom i Srednjobosanskim kantonom usaglasi i sklopi odgovarajuće Podugovore o zajmu kojim će, u svrhu redovne otplate, definirati uslove vraćanja sredstava koja se prenose na osnovu zajma.

#### VII.

Daje se saglasnost za zaključivanje Supsidijarnog sporazuma između Bosne i Hercegovine i Federacije Bosne i Hercegovine, Podugovora o zajmu između Federacije i Zeničko-dobojskog kantona i Federacije i Srednjobosanskog kantona za sredstva iz tačke I. ove Odluke.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija.

#### VIII.

Za realizaciju ove Odluke i izvještavanje zadužuje se Federalno ministarstvo finansija, Srednjobosanski kanton, Zeničko-dobojski kanton i JP Regionalni vodovod „Plava voda“ d.o.o. Travnik, svako u okviru svoje nadležnosti.

#### IX.

Implementacija Sporazuma iz tačke I. ove Odluke, ne zahtijeva donošenje novih ili izmjenu postojećih zakona.

#### X.

Ova Odluka stupa na snagu narednog dana od dana objavljivanja u “Službenim novinama Federacije BiH”.

## **O B R A Z L O Ž E N J E**

### **I - PRAVNI OSNOV**

Pravni osnov za donošenje ove Odluke sadržan je u članu 40. stav (4) Zakona o dugu, zaduživanju i garancijama u Federaciji Bosne i Hercegovine (2Službene novine Federacije BiH", br. 86/07, 24/09, 44/10 i 30/16), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj 44/10) u članu 40. stav (5) predviđeno je da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

### **II - RAZLOZI ZA DONOŠENJE**

Donošenjem ove Odluke stvara se osnov za potpisivanje Supsidijarnog sporazuma između Bosne i Hercegovine i Federacije Bosne i Hercegovine, a zatim će Federacija BiH sredstva zajma dalje proslijediti Zeničko-dobojskom kantonu i Srednjobosanskom kantonu za realizaciju Projekta „Izgradnja regionalnog vodovoda Plava voda“.

Osnovni cilj i svrha Projekta je osiguranje pouzdane, dugoročne opskrbe vodom putem regionalnog sistema vodoopskrbe za općine Travnik, Zenica, Novi Travnik, Vitez i Busovača zahvaćanjem vode iz izvorišta „Plava voda“ lociranog u općini Travnik. Predviđeno je da se kreditnim sredstvima finansiraju troškovi izgradnje vodozahvata na izvorištu „Plava voda“, izgradnje glavnog transportnog cjevovoda od izvorišta „Plava voda“ do rezervoara Putovići u općini Zenica, izgradnje cjevovoda za odvojke za svih pet navedenih općina, od priključka na glavni transportni cjevovod do postojećih ili novoizgrađenih distributivnih rezervoara, troškovi turističkog uređenja lokaliteta „Plava voda“, troškovi uspostave vodozaštitne zone izvorišta i troškovi eksproprijacije.

### **III - OBRAZLOŽENJE POJEDINIH TAČAKA**

**Tačka I.** je nužna kako bi se prihvatilo zaduženje putem CEB-a.

**Tačkom II.** potvrđuje se namjena utroška sredstava zajma.

**Tačkom III.** precizirani su uslovi zajma.

**Tačkom IV.** potvrđuje se da je razmatrana dokumentacija prihvatljiva za Federaciju BiH, što je uslov da Bosna i Hercegovina i CEB pristupe potpisivanju Okvirnog Sporazuma o zajmu.

**Tačkom V.** se definira način implementacije Projekta, te da nije potrebno osigurati dodatna sredstva u budžetu Federacije za ovu namjenu.

**Tačkom VI.** se definira obaveza Federalnog ministarstva finansija da sa Zeničko-dobojskim kantonom i Srednjobosanskim kantonom usaglasi i sklopi odgovarajući Podugovor o zajmu.

**Tačkom VII.** daje se saglasnost za zaključivanje Supsidijarnog sporazuma o zajmu sa Bosnom i Hercegovinom, Podugovora o zajmu između Federacije sa Zeničko-dobojskim kantonom i Federacije i Srednjobosanskog kantona i daje se ovlaštenje federalnom ministru finansija da u ime Federacije potpiše iste.

**Tačkom VIII.** u okvirima nadležnosti definira se obaveza za realizaciju Odluke i izvještavanje.

**Tačkom IX.** se potvrđuje da za implementaciju Okvirnog Sporazuma o zajmu nije potrebno donijeti nove ili izmijeniti postojeće zakone.

**Tačka X.** propisuje stupanje na snagu ove Odluke.